

03 FEB 2004

Khailan-Agong

AGONG BERI PENGHORMATAN TERAKHIR KEPADA IBU PERDANA MENTERI

KEPALA BATAS, 3 Feb (Bernama) -- Yang di-Pertuan Agong Tuanku Syed Sirajuddin Syed Putra Jamalullail dan Raja Permaisuri Agong Tuanku Fauziah Tengku Abdul Rashid petang ini memberi penghormatan terakhir kepada ibu Perdana Menteri Datuk Seri Abdullah Ahmad Badawi.

Allahyarham Datuk Khailan Hassan, 79, meninggal dunia di rumahnya di sini petang semalam.

Baginda berdua tiba di perkarangan rumah pusaka Abdullah di Jalan Perak di sini pada pukul 1.55 petang dan disambut Perdana Menteri dan anggota keluarganya.

Turut sama ialah Yang Dipertua Negeri Tun Abdul Rahman Abbas dan Penasihat Agama Istana Negara Datuk Hassan Din Al-Hafiz.

Baginda berdua menyampaikan ucapan takziah kepada Abdullah sebelum memberi penghormatan terakhir kepada jenazah ibunya di tingkat atas rumah dua tingkat itu.

Baginda berdua mengaminkan doa yang dibacakan Hassan.

Sebelum itu, Timbalan Perdana Menteri Datuk Seri Najib Tun Razak bersama isterinya Datin Seri Rosmah Mansor, tiba pada 1.35 petang untuk memberi penghormatan terakhir mereka.

Beliau dan isteri turut membacakan surah Yassin untuk Allahyarham.

Bekas perdana menteri Tun Dr Mahathir Mohamad dan isteri, Tun Dr Siti Hasmah Mohamad Ali turut memberi penghormatan terakhir kepada ibu Perdana Menteri.

Dr Mahathir dan Dr Siti Hasmah, yang tiba pada pukul 2.40 petang, turut membacakan doa untuk allahyarham Khailan.

-- BERNAMA

NER ZU ZS MOZ RHM